



册府元龜
卷之百四十四
至四十七



1	3
849	
51	



冊 4 3
849
51



冊府元龜

淮南李嗣京叅閱

西極文翔鳳訂正

豫章黃國琦較釋

帝王部

一百四十四

弭災第二

唐高祖武德二年閏二月乙卯詔曰酒醪之用表節制於權娛芻豢之滋致其吉於豐衍然而沈湎之輩絕業忘資惰窳之民騁嗜奔慾方今烽燧尚警兵革未寧年穀不登市肆騰踴趣末者衆浮冗尚多有羞

勸糶重增其費救弊之術要在權宜關內諸州官民宜斷屠酤

四年三月帝以旱故親錄囚徒俄而澍雨

太宗貞觀元年七月關東河南隴右及緣邊諸州霜害秋稼九月辛酉詔曰蟲霜爲害風雨不時政道未康咎徵斯在朕祇奉明命撫育黔黎憂愍之至實切懷抱輕徭薄賦務本勸農必望民殷物阜家給人足而陰陽不和氣候乖舛永言罪已撫心多愧河北燕趙之際山西并潞所管及蒲虞之郊幽延以北或春逢亢旱秋遇霜淫或蝨賊成災嚴凝早降有致饑饉

慚惕無忘特宜矜恤救其疾苦可令中書侍郎溫彥博尚書右丞相魏徵治書侍御史孫伏伽簡較中書舍人辛諳等分往諸州馳驛檢行其苗稼不熟之處使知損耗多少戶口乏糧之家存問若爲支計必當細勘速以奏聞待使人還京量行賑濟

十月丁酉以歲饑貶膳

三年四月丙午以旱甚避正殿六月詔曰朕以眇身祗膺大寶託王公之上居億兆之尊勵志克己詳求至治兢兢業業四載于茲矣上不能使陰陽順序風雨以時下不能使禮樂興行家給人足而關輔之地

州府元龜 帝王部 卷之一百四十四
迎年不稔自春及夏亢陽爲虐雖復潔誠祈禱靡愛
斯牲膏雨愆應田疇廢業斯乃上玄貽譴在予一人
元元何辜罹此災害朕是用食不甘味寢不安席瞻
西郊而載惕仰雲漢而疚心內顧諸已永懷前載既
明不自見德不被物豈賞罰不衷任用失所將奢侈
采革苞苴尚行者乎文武百辟宜各上封事極言朕
過勿有所隱是月遣開府儀同三司長孫無忌左僕
射房玄齡工部尚書段綸刑部尚書韓仲良祈雨於
名山大川

八年七月隴右山摧大蛇見山東河南淮海之地多

大水帝以問祕書監虞世南曰是何祥也脩何術可
以禳之對曰蛇見山澤蓋深山大澤必有龍蛇亦不
足怖也山東足雨雖則其嘗陰慘過久恐有冤獄伏
願科省係囚庶幾或當天意且妖不勝德唯修德可
消變帝然之遣使者分道賑恤餓人申理獄訟多所
原免

十月彗星見帝謂羣臣曰天見彗星是何妖也祕書
監虞世南對曰昔齊景公時有彗星見公問晏子晏
子對曰公穿池沼畏不深起臺榭畏不高行刑罰畏
不重是以天見彗星爲公誠景公懼而修德後十六

日而星沒臣聞天時不如地利地利不如人和若政德不修麟鳳數見終是無補但使百姓安樂朝無闕政雖有災變何損于時然願陛下勿以功高古人而自矜大勿以太平漸久而自驕怠慎終如始彗星未足爲憂帝曰吾之治國良無景公之過但吾纔弱冠舉義兵年二十四平天下木三十而居大位自謂三代以降撥亂之主莫臻於此重以薛舉之驍雄宋金剛之鷲猛竇建德跨河北王世充據雒陽當此之時足爲勍敵而皆爲我所擒及逢家難吾復決意安社稷遂登九五降服北夷吾頗有自矜之志以輕天下

之士此吾之罪也上天見變良爲是乎秦始皇平六國隋煬帝富四海旣驕且逸一朝而敗吾亦何得自驕言念于此不覺惕焉懼矣温彦博進曰昔宋公一言彗星三徙陛下見變而懼災其消乎

十一年七月車駕巡雒陽詔以水災諸司供進悉令減省凡在供役量事停廢

十五年六月有星孛于太微宮帝旣罷封禪于是避正寢減嘗饌申以祇誠星退乃復

十七年三月甲子以久旱詔曰去冬之間雪無盈尺今春之內雨不及時載想田疇恐乖豐稔農爲政本

食乃人天百姓嗷然萬箱何異昔頽城之婦墮霜之
臣至誠所通感應天地今州縣獄訟常有寃滯者是
以上天降鑒延及兆庶宜令覆囚使至州縣科簡刑
獄以申枉屈務從寬宥以布朕懷庶使桑林自責不
獨美於殷湯齊郡表墳豈自高於漢代

六月癸巳以旱不視朝乙巳謂侍臣曰殷湯周宣求
雨懇禱昔聞其語今見其心比望雲蒸雨濃重於金
膏玉液又詔曰朕以寡德祗膺寶命而政慙稽古誠
關動天和氣愆于陰陽亢旱涉於春夏靡愛斯牲莫
降雲雨之澤詳思厥咎在予一人今避茲正殿以自

剋責尚食嘗膳亦宜量減京官五品已上各進封事
極言無隱朕將親覽以答天譴

高宗永徽五年正月以時旱手詔京官文武九品已
上及朝集使各進封事極言厥咎
顯慶元年二月上封人奏稱去歲粟麥不登百姓有
食糟糠者帝命取所食物視之驚嘆手詔曰上封人
所進食極惡情之憂灼中宵輒寐永言給足取愧良
深夫國以人爲本以食爲天百姓不足君孰與足朕
臨御天下于今七年每留心庶績軫慮農畝而政道
未凝仁風猶缺致令九年無備四氣有乖遂使去秋

霖滯便卽罄竭所以佇西郊而結念春東作以勞懷
豈下乏農夫上甘瓊饌宜令所司嘗進之食三分減
二羣臣奏言伏見手詔以近畿諸州百姓少食特爲
減膳去年雖不善熟未是大饑陛下憂勞情深發使
賑給復爲減膳在外黎庶不勝喜慶帝曰比日亦聞
百姓食少不足爲至是今所見者乃非人所食物朕
聞天子以百姓心爲心豈有見有如此一身獨供
饌自見此食憂歎不能已也三月澍雨百寮請復嘗
膳許之

四年七月以亢旱避正殿

總章元年四月丙辰彗星見於五車帝避正殿御延
福殿前東廊事令中御減膳奉常停樂仍令内外文
武九品已上各上封事極言得失勿令有隱太子少
師許敬宗等奏稱星雖字而光芒小此非國胄不足
上勞聖慮請御正殿復嘗膳帝曰朕獲奉宗廟臨馭
億兆謫見于天誠朕之不德也不從所請敬宗等又
奏曰陛下至仁被物克享靈心東封告成休徵應兆
伐叛懷柔無遠不屆若不上符天意豈能致此雖有
高麗一隅上阻王命天軍問罪殄滅有期謫見東北
當其分野上玄星象見彼咎徵臣等不勝慶悅帝曰

天道既遠非人所測我爲萬國主豈可推過於小蕃哉戊辰彗星滅

二年二月戊辰以旱親慮京城囚徒其天下見禁囚委當州長官慮之仍令所司分禱名山大川咸亨元年三月以歲旱穀貴詔司成弘文崇賢館及書筭律醫胡書等諸色學生并別勅修饌寫經書官典及書手等官供食料者宜並權停其有職任者各還本司自餘放歸本貫秋熟已後更聽進止八年以時旱親慮囚徒多有原宥仍令沛王賢慮諸司囚周王顯慮雒州及兩縣囚

上元二年四月久旱避正殿減膳徹懸兼令百官極言得失勿有所隱仍令禮部尚書楊思敬往中嶽以申祈禱

三年七月彗星見于東井光芒長至三丈掃中台指文昌宮帝避正殿詔中殿徹膳太常停樂兼減食粟之馬遣使慮岐州及京城囚徒内外文武官各進封事勿有所隱

八月青州大風齊淄等七州大水詔停此中尚梨園等作坊減少府監雜匠放還本邑兩京及九成宮土木工作亦罷之天下囚徒委諸州長官慮之

儀鳳三年四月朔以旱避正殿親慮京城繫囚悉原宥之

永隆二年正月己亥詔曰朕聞受上天之命者其道在乎愛人處皇王之位者其功先於濟物然則所修在德池籙可以假貧人所寶惟賢珠玩不足奉諸已自朕臨馭天下三十餘年永念黎元情深撫育頻頒制命猶未遵行所有差科尚多勞擾關中地狹衣食難周山東遭澇糧儲或少刺史縣令寄以字人長史司馬職惟毗贊若能恤隱求瘼清直無私則囹圄于是空虛鰥寡自然蘇息而在外官司罕能奉法志存

苟且不舉綱維欲使訟息刑清家給人足無爲而化其路何繇今當勵精求政先身理物救乏賜無自邇及遠凡在寮庶宜識至懷其殿中太僕寺馬並令減送羣牧諸方貢獻物及供進口味百司支料並宜量事減省雍岐華同四州六等已下戶宜免兩年地稅河北澇損戶嘗式蠲放之外特免一年調其有屋宇遭水破壞及糧食乏絕者令州縣勸課助修并加給貸

永淳元年正月朔以年饑受朝賀而不設會放雍州諸府兵士於鄧綏等州就穀

中宗神龍二年正月以旱親錄囚徒多所原宥其東都及天下諸州委所在長官詳慮又遣使祭五嶽四瀆并諸州名山大川能興雲雨者

五月以旱避正殿尚食減膳

睿宗延和元年七月丙戌以炎旱命減膳囚徒並決斷勿使寬滯土木之功並停

玄宗先天二年六月以久霖雨告乾陵及太廟帝減膳避正殿

開元二年正月關中饑下詔曰朕聞諸易曰先天而天不違後天而奉天時天且弗違况於人乎因斯而言則君事於天養於人行月令順時物也朕以不德恭膺斯運靜言詢政每用憂勞屬獻歲發春東風解凍土膏脉散草樹自樂而天久不雨元元何辜孰可以授農事拯彼饑者豈布德利施慶惠尚不及歟豈掩骼埋胔無羸無卵尚不及歟豈名山大川修祭命祀尚不及歟欽若令典惟增所懼緬懷大猷思補其闕有司可稽春令以稱朕心其有直諫昌言弘益政理者朕將親覽罔或隱避不急之務一切停息見禁囚徒速令處置宜從寬大勿使稱冤本州本軍刺史軍將境內所有名山大川能興雲致雨者並宜祈祭

其有僵屍暴骸無主收斂者亦仰埋掩量致祭訖各具狀奏聞應須酒脯宜用官物古者雪冤婦於東海問刑人于北寺則以早之故應時如響至千山不童澤不竭使霈然以降興而致之復何遠也將達精誠務修蠲潔俾幽坎遂性飛走從宜則冀天之愛人月離于畢頤頤之望感而遂通布告遐邇令知此意二月帝親慮囚徒宰臣等奏曰陛下亢旱親降德音減膳徹樂朝野之人無任欣感然食粟之馬在廄猶多臣請馬料日減其半廻給饑戶則人畜偕濟免供臆之乏許之

四月壬子以久雨命有司榮京城門

三年五月戊申以旱故下詔曰司牧生人愛之如子睠茲災旱倍切憂勤將理政不明邪冤囚有滯邪疵癘道長邪陰陽氣隔邪何崇朝密雲布未洽也載加寅畏弗敢荒寧誠不動天歎深罪已思從避減以塞愆尤俾月離有期星退何遠朕今避正殿減常膳仍令諸司長官各言時政得失以輔朕之不逮天下見禁囚徒中或以痛自誣者各令長官審加詳覆疑有冤濫隨事案理仍告於社稷備展誠祈諸州旱處有山川能興雲致雨者亦委州縣官長速加禱祀

四年五月甲辰詔曰今年蝗蟲暴起乃是孽生所繇官司不早除遏信蟲成長開食田苗不恤人災自爲身計向若信其拘忌不有指麾則山東田苗掃地俱盡使人等至彼催督其中猶有推託以此當委官員責實若有勤勞用命保護田苗須有褒貶以明得失前後使人等審定功過各具所繇州縣長官等姓名聞此蟲若不盡除今年還更生子委使人分州縣計會勿使遺類是時山東諸州蝗蟲五月末在處生于陂澤鹵田尤甚縣官或隨處掘穿埋瘞放火焚滅殺百萬餘石餘皆高飛奏海蔽天掩野會潮水至盡漂死焉蝗蟲積成堆岸及爲鴟鵂白鷗練鵲所食種類遂絕

八月詔河南北簡較蝗蟲使狄光嗣康敬昭高道昌賈彥璿等宜令待蟲盡看刈禾有次第然後入京奏事恐山澤之內或遺子息農隙已後各令府州縣長簡較仍告按察使如來年巡察更令蟲出所繇官量事貶降

六年七月帝以亢旱不御正殿於小殿視事詔曰皇天應人必有所謂此月少雨蓋非徒然深慮繫囚或有寃滯京城內諸司見禁囚徒並以來日過朕將親

慮所司量准舊典其杖以下情不可恕者速決自餘
卽放却

七年五月朔日有食之帝素服以候變徹樂減膳令
中書門下省察囚繫及天下水旱之州皆令賑恤不
急之務一切停罷七月詔曰今月初雖降時雨自
此之後頗憊其液如聞側近禾豆微致焦萎深用憂
勞式資祈請丘禱則久當典宜遵卽令禮部侍郎王
丘太常少卿李暉分往華嶽河瀆祈求甲申親慮囚
於宣政殿事非切害悉原之詔曰朕以匪德嗣膺不
命雖日慎爲誠政期以康而天災流行誠或未感自

孟秋在候雨澤愆足永念農畝用懷宵旰在予之責
萬方何罪視人如傷一物增怵且夫修政之要恤刑
之重雖得情勿喜寧僭無濫將恐此輩猶有寃人或
傷於和而作此厲法惟明慎事藉躬親故爰加案省
開其幽滯雖士師不寃時稱閤實而愚者自陷朕甚
愍焉故屈嘗法特申寬典丙戌詔曰爰自春首頗憊
其澤眷茲近甸將損嘉苗人天謂何夙夜增怵豈刑
罰莫省罪獄其紛儻致吁嗟是生炎亢故京師囚繫
親慮原減而郡縣狴牢將何慎恤平分之道載軫于
懷天下諸州見繫囚徒宜令所繇長官便慮有司卽

此類作條件處分

九年夏五月己未勅諸州水旱時有其五嶽四瀆宜令所司差使致祭自餘名山大川及古帝王并名賢將相陵墓並令所司州縣長官致祭仍各修飾洒掃十二年七月河東河北旱命中書舍人寇泚宣慰河東道給事中李昇期宣慰河北道百姓有匱乏者量事賑給帝親禱于內壇場三日曝立

十四年六月丁未以久旱分命六卿祭山川詔曰五嶽視三公之位四瀆當諸侯之秩載于祀典亦爲國章方屬農功頗增旱暵虔誠徒積神道未孚用申靡愛之勤莫通能潤之感宜令工部尚書盧從愿祭東嶽河南尹張敬忠祭中嶽御史中丞兼戶部侍郎宇文融祭西嶽及西海河瀆太常少卿張九齡祭南嶽及南海黃門侍郎李暉祭北嶽右庶子何鸞祭東海宗正少卿鄭絛祭淮瀆少詹事張晤祭江瀆河南少尹李暉祭北海及濟瀆且潤萬物者莫先乎雨動萬物者莫先乎風眷彼靈神是稱師伯雖有常祀今更陳祈宜令光祿卿孟溫祭風伯左庶子吳兢祭雨師各就壇壝務加崇敬但羞蘋藻不假牲牢應緣奠祭尤宜精潔壬戌以旱及風災命官及州縣長官上封

事指言時政得失無有所隱

十六年九月以久雨帝思宥罪緩刑乃下制曰古之善爲邦者重人之命執法之中所以和氣洽嘉生茂今秋京城連雨隔月恐耗其膏粒而害于塗盛抑朕之不明何政之闕也永惟久雨者陰氣凌陽冤塞不暢之所致也持獄之吏不有刑罰生於刻薄輕重出於愛憎邪詩曰此宜無罪汝反收之刺壞法也書曰與其殺不辜寧失不經明慎刑也好生之德可不務乎兩京及諸州繫囚應推徒已下罪並宜釋放死罪及流各減一等庶得解吾人之愠結迎上天之福祐

布告遐邇知朕意焉

二十一年四月以久旱命太子少保陸象先戶部尚書杜暹等七人往諸道宣慰賑給仍令黜陟官吏疎決囚徒

天寶十二年八月京師連雨三十餘日米涌貴令中書門下就京兆大理疎決囚徒
十四載三月詔曰近日以來時雨未降在於宿麥慮有所傷雖憂勤之心不忘於黎庶而精誠之至冀展於靈祇宜令太子太師陳希烈祭玄冥光祿卿李愷祭風伯國子祭酒李麟祭雨師仍取今年二十三日

各申誠請務令蠲潔如朕意焉又詔曰關輔郡邑霈澤屢施京城在近時雨未降是用軫慮匪寧于懷其諸郡壇雖已勤請攸資遍祭庶達誠心宜令吏部侍郎蔣烈今月二十五日祭天皇地祇給事中王維等分祭于五星壇務申虔潔以副朕懷

肅宗至德二年三月癸亥大雨至癸酉不止帝令恤獄緩刑詔三司條件疎理處分甲戌雨止

乾元元年五月己亥亢旱陰陽人李奉先自大明宮出金龍及繼錢太常音樂迎之送於曲江池投龍祈雨宰相及禮官並於池所行祭禮畢奉先投龍於池

二年三月癸亥以久旱徙東西二市於是祭風伯雨師修雲祀壇爲泥人土龍及望祭名山大川而祈雨代宗永泰元年七月以久旱遣近臣分錄大理京兆囚徒

三年六月庚子以大旱分遣左僕射裴冕等禱祝川瀆及徙市閉諸坊門祀風伯雨師是日乃雨
大曆四年自四月雨連霖至秋京師米斗至八百官出米二萬石分場出糶貧人閉坊市北門置土臺及黃幡以祈晴是日雨止

德宗貞元元年五月癸卯命右庶子裴諝殿中少監

馬錫鴻臚少卿韋儉分禱終南秦嶺諸山以祈雨
十二月丁亥詔曰朕以眇身繼明殫聖不能纂修先
志以治昇平馴致寇戎屢興兵革上玄降警蝗旱爲
災年不順成人方歉食言念於此實用傷懷是以齊
心別宮與人祈穀雖陽和在候而黔首無聊稱慶于
予竊所不敢其來年正月一日朝賀宜罷
二年正月壬辰朔以關輔荒饑停朝賀之禮丙申詔
曰朕以薄德託于天上勵精思理期致雍熙而鑒之
不明百度多缺傷痍未瘳而征役荐起流亡旣甚而
賦歛彌繁人怨上聞天災下降連歲蝗旱盪無農收

惟茲近郊遭害尤甚豈非昊穹作沴深警予衷踟躕
憂慙罔知攸措今穀價騰踊人情震驚鄉閭不居骨
肉相棄流離殞斃所不忍聞公私之間廩食俱竭旣
無賑恤猶復徵求財殫力盡捶楚仍及弛征則軍莫
之贍厚取則人何以堪念茲困窮痛切心骨思所以
濟浩無津涯補過實在於增修救患莫如于息費致
咎之本旣繇朕躬謝譴之誠當自朕始尚食每日所
進御膳宜各減一半應宮內人等每月唯供給糧米
一千五百石其飛龍廐馬從今已後至四月三十日
並減半料京兆尹應科徵諸色名目一切並停如有

能減有均無調救貧乏者當受以官秩
五月百寮上表諸復御膳先以旱蝗寇盜充斥故從
貶省至是從之

六年三月以旱故遣使分禱山川是春京畿關輔河
南大無麥苗

十一年五月以旱故令禮部尚書董進巡覆百司禁
四

十二年四月以久旱令百司速決囚徒

十五年三月以久旱令李嶸鄭雲達於炭谷秦嶺祈
雨

四月以久旱令陰陽術士陳混嘗呂廣順及摩尼師
祈雨

十九年正月至於六月不雨分公卿望祈于微鎮海
瀆名山大川精禱于太社太稷太廟天皇地祇及山
川能出雲爲雨者

六月詔曰京師近郊時雨未洽慮囹圄冤滯致傷和
氣是用軫於朕心其御史臺大理寺及京兆府等諸
司繫囚中書門下與有司亟議條理冤滯以聞
憲宗元和七年三月庚午以旱故詔京畿內禁囚徒
擬罪輕重宜疎理處分

八年六月辛丑命出官人二百車許人得娶以為妻以水害誠陰盈故也

冊府元龜

淮南李嗣京叅閱

西極文翔鳳訂正

豫章黃國琦較釋

帝王部

一百四十五

弭災第三

唐穆宗長慶二年十二月己亥詔曰自冬以來甚少雨雪農耕方始災旱是虞慮有寃滯感傷和氣宜委御史臺大理寺及府縣長吏自錄囚徒仍速決遣除身犯罪應支證追呼近繫者一切並令放出須辨對

者任其責保冀得克消沴氣延致休祥
四年六月辛巳詔曰近者夏麥垂熟霖雨稍多雖不
甚損傷亦是陰陽小沴必慮囚徒之中或有寃濫宜
令御史中丞刑部侍郎大理卿同疎理決遣訖聞奏
其在內諸軍使囚徒亦委本司疎決聞奏

敬宗寶曆二年六月癸亥詔曰近日京城雖已得雨
畿甸之內霑灑未周災歉是虞黎元重困救旱之備
深所注懷宜令京兆府各勒諸縣令長疎理見禁囚
徒除首罪外餘支證並責保放出其有法不得原情
有可恕者府司一一條舉當爲蠲免御史臺大理寺

亦委本司長官親自覆視准前處分災熾方甚徃年
可矜京城及畿內諸獄亦宜並與除放冀得存活
文宗太和元年六月庚子詔緣自夏少雨應見禁囚
徒宜差清疆御史各就諸司巡勘速理聞奏無令寃
滯是月以霖潦詔京城見禁囚徒慮有寃滯宜令御
史臺府縣及諸司各量輕重疎決三日內聞奏
六年五月庚申詔曰朕聞王者之理天下一物失所
輿納隍之咎一夫不獲歎時予之辜雖饑疫凶荒國
家代有而陰陽祲沴儆戒朕躬自諸道水旱害人疫
疾相繼宵旰罪已興寢疚懷屢降詔書俾副勤恤發

廩蠲賦救患賑貧亦謂至矣今長吏申奏札瘥猶甚
蓋教化未感於蒸人精誠未格於天地法令之或爽
官吏之或非百姓稱冤稅役多弊姦賊未去農業失
時有一于茲皆傷和氣並委內外文武嘗參官一
條疏各具所見聞奏必當親覽無憚直言其諸道應
災荒處疾疫之家有一門盡歿者官給凶具隨事瘞
藏一家如有口累疫死一半者量事與本戶稅錢三
分中減一分死一半已上者與減一半本戶稅其疫
未定處並委長吏差官巡撫量給醫藥詢問救療之
術各加拯濟事畢條疏奏來其有一家長大者皆死
所餘孩稚十二至襁褓者不能自活必致夭傷長吏
勒其近親收養仍官中給兩月糧亦具都數聞奏江
南諸道既有凶荒賦入上供悉多蠲減國用嘗限或
慮不充宗廟切急所須外所有舊例市買貯備雜物
一事已上並仰權停待歲熟時和則舉處分於戲朕
自臨御于今七年兢兢乾乾不敢自逸而冲昧寡德
未能燮調艱旱水災或罹於藩郡夭亡疾苦或害於
生人悼於厥心省已自責其州府長吏各奉詔條勉
加拯卹

七月壬寅詔曰秋稼方茂時稍愆亢慮有冤繫致傷

和氣應內外諸司見禁囚徒各委本司長吏隨罪疎
決務從寬典副我憂懷

七年正月壬子詔曰朕承上天之眷佑荷累聖之不
圖宵旰兢勞不敢暇逸思致康乂八年于今而水旱
流行疾疫作沴兆庶艱食札瘥相仍蓋德未動天誠
未感物一類失所有過在予載懷罪已之心深軫納
隍之歎宜敷惠澤式表憂勤如聞去年以來河東關
輔亢旱爲災秋稼不收人甚窮困今方春之時須務
農事若不賑救恐至流亡其京兆府河中等九州府
宜賜七萬石同華陝虢晉等州各賜十萬石並以嘗

平義倉及折糴斛斗充無本色以運米折給爲本州
府長吏明作等第差官吏對面宣賜先從貧下起給
京兆府太和六年青苗推酒錢在百姓腹內並放免
京兆河中同華陝虢晉絳等州府自太和六年秋稅
以前諸色逋懸在百姓腹內悉放免議獄恤刑前王
攸重苟有寬滯卽傷陽和應在城諸司諸使應有囚
徒限七月內處分訖奏聞河南府八州府勅到准此
處分諸色功役非灼然交切者勒停應管內各山大
川能致風雨者委長吏精誠禱請水旱之數雖云嘗
理導化失節亦致咎災顧惟寡昧敢忘剋責嘗參官

及外州府長吏如有規諫者各上封事極言得失俟有規正期於阜安咸啓乃誠用致予理無或有隱以忝在公內外官有貪暴殘害蠹政害人者臺司紀察聞奏朕爲人父母處奉丕業夕惕若厲夙興匪寧減膳徹樂庶答天戒咨爾長吏實分子憂勉加撫綏用副惻隱庶切救災之義爰申爲上之懷中外臣僚宜體朕意

七月己酉勅曰今緣稼穡方茲旬月少雨慮其宛滯或有感傷宜委左僕射李程及御史大夫鄭覃同就尚書省疎理諸司囚徒務從寬降限五日內畢聞奏

其外州府爲有稍旱處委長吏速准此處分壬子以旱命吏部尚書令狐楚御史大夫鄭覃同疎決囚徒甲寅徙市

閏七月乙卯詔曰朕嗣纂聖圖覆育生類兢業寅畏上承天休而陰陽失和膏澤僭候害我稼穡災于黔黎有過在予敢忘咎責是用避殿徹樂減膳省刑思惕慮以覃思庶薦誠而致雨時澤未降已來朕當避正殿減供膳太嘗教坊聲樂權停閣習飛龍廐馬量減食粟其百司官署厨饌亦且權減陰陽鬱堙繫繫傷害有紊和氣是乖燮調今放出官人一千人其諸

道今年合進鷹犬宜數內停減一百頭聯在五坊者
宜減放一百頭聯京城囚徒慮有寃滯已委疎決務
從寬降宜令鄭覃令狐楚速具條疏聞奏內外諸司
先有脩造稍非急切者並宜停省公卿百寮及戚里
舊將相之家如有僭侈踰制委御史臺糾察聞奏諸
州府長吏及縣令有貪縱苛暴者委御史臺訪察聞
奏名山大川及能興雲致雨者各委長吏精誠祈禱
於戲朕受天眷佑爲人父母曠旱作沴焦勞匪寧徧
祀山川靡愛瑋璧菲食罪已緩獄消災載深勤雨之
心冀警納隍之戒凡百士庶宜諒予懷時以久無兩
帝徧走羣望至是復有此詔旣而其澤普霑人心大
悅

八年六月甲午詔曰近者咎徵所集陽亢成災靡神
不宗未獲嘉應豈刑政之尚乖其當將獄行之未察
其寃夙興以思庶答天譴宜令尚書右僕射李逢吉
御史大夫鄭覃於尚書省疎理刑獄輕繫者咸從於
決遣重條者議所以矜寬小大以情必詳必慎致誠
無怠稱朕意焉丁酉詔曰時屬亢陽慮有寃繫應諸
州府囚徒各委所在長吏疎理處分務從寬降其緣
制獄未決遣者委刑部大理寺速立限奏覆稍涉留

滯者仍令御史臺糾劾舉奏

九年三月乙丑制以仍歲水旱黎民艱食其宰牧非才貪殘爲害及承前積弊須有條疏或寃獄留滯速宜疎決者並委觀察使糾察詳訪具狀聞奏用弭天

七月詔曲江零土龍

開成二年三月壬申以妖星見降詔誠百司及天下州府見禁囚徒死者從流流已下並釋放膏澤不愆播種伊始土木興役恐妨農功禁中及百司所有修造並宜權停韶陽御辰生氣方盛思全物類以順天

時內外五坊凡有籠養鷹鷂及鷄鴨鳥雀狐兔等悉宜放之朕今素服避殿命太嘗徹樂太官減膳一日嘗分爲一旬嘗參官及諸州府長吏如有規謀者各上封事極言得失陳救災之本明致理之方咸竭乃心以輔厥辟於戲朕明誠未感化理未孚謹告在天丁寧斯甚所宜盡意其與同憂勉進嘉言共凝庶績躬違納誨副茲虛懷宣示內外各令知悉甲戌以彗星見命京師諸佛寺開仁王經道場

四月戊申詔曰自春以來未降甘澤從來但以過時無雨議祈禱及至降洒已似後時今雖未旱亦要沾

洽各宜差官精誠祈禱

七月庚午詔曰農人徧野其澤稍愆眷言時苗未保收獲齋心懇禱猶望有成各宜差長吏所在靈廟禱祈乙亥以久旱移市開坊市南門乙酉詔曰秋旱未雨慮有幽冤縲禁多時須議疎決京司刑獄宜令右僕射兼門下侍郎平章事鄭覃親往疎理乃分命宰臣祈雨於太廟太社白帝壇巳丑遣侍御史崔虞孫範各往諸道巡覆蝗蟲并加宣慰

三年正月乙亥京兆尹崔珙奏畿內去冬少雪宿麥未滋今欲差少尹於終南廣惠公廟祈禱諸縣各委令長於靈跡處精誠祈請從之癸未詔曰朕自守丕訓恭臨大寶兢兢業業十有三年何嘗不惠下以愛人克已以利物外無畋遊之樂內絕土木之功浣衣菲食宵興夕惕厚於身者無不去便於人者無不行損羣方之底貢驅時風於樸素將以弘祖宗法制致夷夏雍熙勤求理道日異平泰而去秋旱蝗所及稼穡卒瘁哀此蒸人懼罹艱食是用順時布令助煦育之深仁施惠覃恩法雨露之殊澤其淄青兗海鄆曹濮去秋蝗蟲害物備甚其三道有去年上供錢及斛斗在百姓腹內者並宜放免今年夏稅上供錢及斛

斗亦宜全放仍以當處嘗平義倉斛斗速加賑救京兆府諸州府應有蝗蟲米穀貴處亦宜以嘗平義倉及側近官中所貯斛斗量加賑賜閉糴禁錢爲時之蠹方將革弊尤藉通商其見錢及斛斗所在方鎮州府輒不得擅有壅遏任其交易必使流行仍委出使郎官御史及所在度支鹽鐵巡院切加勾當兼委車運使設法般運江淮糙米於河陰貯積以備節級賑救應方鎮州府借使度支鹽鐵戶部錢物斛斗經五年已上者並宜放免刑獄之重人命所懸將絕冤濫必資慎恤京城百司及畿內見禁囚徒委中書門下

差官疎理無使滯寬於戲唯此凶災是彰菲德情敢忘於罪已惠所貴於及人施令布和期於蘇息凡厥臣庶宜體朕懷

十一月壬戌帝以妖星見詔京城百司及諸道州府十一月八日以前見禁囚徒未經勅斷者犯死罪並降從流流已下遞減一等其十惡及謀殺人劫盜賊并官典犯贓不在此限諸道今年遭水及蝗蟲州縣人戶等宜委觀察使與州縣長吏計會精加訪察勿憚奏論諸道所有進獻時新委中書門下更點勘樽減以稱朕意京畿之內百役繁興欲其阜安切在憂

卹其今年二月二十五日勅賑貸諸縣百姓糧種粟八萬四千九百七十八石如聞數內半是義倉斛斛此乃救災之備豐年自合收填其餘有戶部管係者並宜停徵以俟來歲畿內諸縣應有開成元年已前諸色逋欠仍委度支與府司同檢勘聞奏如是官吏破用不在此限皇太子葬事緣卜日稍近但令粗及禮制不必過務虛儀以涉繁冗則湏裁減冀無害物夫豈傷恩易定兩州地里深阻近者守臣喪歿軍中初有異圖累譴詔書申明事理革心遷善章表繼來張元益出定州後應是初扶樹元益有違朝旨者自

將較至于官健委新節度使安存懾諭並從洗釋如或輒相告訐却以其罪罪之冀使藩方永無疑懼文武百寮及諸色人有能通達刪政之源參考天人之際任各上章疏指言得失至於徹樂減膳抑亦舊章便當內自指揮不復更形綸翰宣示中外宜體朕懷懿宗咸通十年六月戊戌制曰動天地者莫若精誠致和平者莫若修政朕顧惟庸昧託于玉公之上于茲十一年矣祗荷丕構寅畏小心慕唐堯之欽若昊天遵周王之昭事上帝念茲夙夜靡替虔恭同馭朽之憂勤思納隍之軫慮內戒奢靡外罷畋遊匪敢期

冊府元龜 帝王部 卷之一百四十五 十一
於雍熙祈自得於清淨上望寰區無事稼穡有年而
燭理不明涉道惟淺氣多堙鬱誠未感通旱暵是虞
蟲螟爲害蠻蛋未賓於遐裔寇盜復蠹於中原尚駕
戎車益調兵食俾黎元之重困每宵旰而忘安今盛
夏驕陽時雨久曠憂勤蒸庶旦夕焦勞內修香火以
虔祈外罄牲玉以精禱仰俟玄貺必致甘滋而油雲
未興秋稼關望觀茲愆亢軫于誠懷復慮暴政煩刑
強官酷吏侵漁囊橐陷害孤寡致有冤抑之人搆成
災沴之氣主守長吏無忘奉公俄叛興師蓋非獲已
除姦討逆必使當辜苟或隔及平人自然風雨愆候

凡行營將帥切在審詳昭示惻憫之心敬聽勸卹之
旨應京城天下諸州府見禁囚徒除十惡五逆官典
犯賊故意殺人合造毒藥火光持杖開劫墳墓及關
連徐州逆黨外並宜量罪輕重速令決遣無久繫留
雷雨不周田疇方瘁誠宜愍物以示好生其京城未
降雨間宜令坊市權斷屠宰昨陝虢中使迴方知蝗
旱有損處諸道長吏分憂共理宜各推公共思濟物
界內有饑歉切在慰安哀此蒸人無俾艱食徐方寇
孽未殄師旅有征凡合誅鋤審分淑慝無令脅從橫
死元惡偷生宜申告代之文使知逆順之理於戲每

思禹湯之罪已其庶成康之措刑孰謂德信未孚教化猶梗咨爾多士毗予一人旣引過在躬亦漸幾于理布告中外稱朕意焉

哀宗天祐二年三月詔曰朕以宿麥未登時陽久亢慮闕粢盛之備軫予宵旰之憂所宜避正位於宸居減琫羞於嘗膳諒惟眇質深合罪躬庶共昭感之祥以致滂沱之澤今月八日已後不坐正殿及減常膳四月壬申詔曰朕以冲幼克嗣丕基業業兢兢敬恭夕惕今以彗星謫見深宜罪躬雖已降恩赦更起今月二十四日避正殿減嘗膳明自思過咎也已未司

天臺奏星文彗見請于太清宮建黃籙道場從之三年九月詔以久雨恐妨農事遣工部侍郎孔績祭定鼎門如不止止于三日

後唐莊宗同光元年十二月庚寅自冬無雪差官分道祭於百神

二年二月自冬不雨命禱百神

三年勅時雨稍憊差官祈禱

八月乙未勅旬日霖雨恐傷秋稼湏命祈止冀獲開晴可差官分禱祠廟

九月有司上言以八月二日夜五鼓四籌熒惑犯星

二度星周之分請依法禳之於京城四門懸東流水
一罌兼令關坊都市嚴備盜火止絕夜行從之

十二月戊寅勅節及杪冬稍憊時雪湏命祈禱以濟
農功宜令有司差官分命祈祭諸神廟乙酉輿駕幸
廣化寺祈雪

三年正月戊午時雨稍憊命與唐府差官分禱祠廟
二月辛丑帝祈雨於郭伯神祠

四月丁卯勅時雨少憊恐妨農事湏命祈禱冀遂豐
登宜令差官分道祈禱百神癸酉租庸院奏時雨少
憊恐傷宿麥兼慮有妨耕稼請諸道州府依法祈禱

從之辛巳勅亢陽稍甚祈禱未徵將致感通難避勞
擾宜令河南府於府門造五方龍集巫禱祭徙市

五月壬子勅時雨尚未沾足宜令河南府徙市閉坊
門依法畫龍置水祈請令宰臣於諸寺燒香戊申帝
幸龍門之廣化寺開佛塔請雨

七月丁酉勅河南尹依法祈晴巳亥勅淫雨稍甚宜
差官分道祈晴

九月辛卯朔勅霖雨未止恐傷苗稼及妨收穫宜令
差官於諸寺觀神祠虔心祈禱仍令河南府差官應
有靈迹處精虔祈止丙午勅霖雨未晴宜令宰臣尚

書丞郎分於寺觀祈晴

四年正月諸道各奏准宣爲去年十月地震命僧道置消災道場

明宗天成元年五月辛未以時雨稍憊分命朝臣禱祠嶽瀆八月勅久雨不晴慮傷農稼可申命禱祭仍曉諭天下州府疏理繫囚無令寃滯

十月己丑日月色皆赤庚寅日月尚赤遣使祠五嶽丁酉勅自秋涉冬稍憊雨雪慮傷宿麥宜令禱祠分遣朝臣告祠羣望宜付所司

二年正月司天奏今年歲日五鼓後東方有青黑雲

主歲多陰雨宜行禳禱祠從之

六月癸未宣宰臣於諸寺祈雨辛丑勅近以時雨稍憊恐傷禾稼爰命祈禱果獲感通宜令本官各於本處賽謝

三年七月霖雨稍甚命宰臣散於寺觀祈晴八月汴州稍旱命丞相祈雨於寺觀

十二月以十月至是月少雪命公卿散祈於祠廟四年十二月丙午中書舍人程遜奏三冬未降時雪請命臣僚虔申祈禱從之

長興元年四月甲辰勅自夏以來稍憊時雨宜差官

祈禱

二年三月勅自春以來稍愆時雨宜分命朝臣祈禱
四月乙巳帝幸龍門寺祈雨至晚還宮乙卯勅久愆
時雨深疚予心雖遍虔祈猶未溥足宜廣推恩之道
更敷恤物之懷貴獲感通必彰靈應宜令諸道州府
各委長吏親問刑獄省察冤濫應見禁囚徒除犯死
刑外餘盡時疎放除省司主持廻圖敗闕軍將及諸
色人等見別指揮三司商量或有情可矜憫或非欺
罔積年致有逋懸各具分析續行勅命并公私債負
放至秋熟填納今年取者不在此限

八月丙子勅陰雨稍頻慮妨收穫宜令河南府依古
法祈晴

三年三月丙申帝以春雨稍頻慮妨耕種宜令河南
府依古法祈晴帝問翰林叅謀趙延文自春以來頻
雨何故奏曰緣火犯井所以頻雨兼雷聲似夏並不
益時乞寬刑獄從之壬寅司天奏以時雨過多請差
官禱祭從之六月辛酉命文武百官應在京寺觀神
祠祈晴又勅霖雨積旬尚未晴霽曠言刑獄慮在滯
淹京城諸司繫囚並宜疎理釋放
七月以久雨未晴分命禱祭勅天下州府見禁囚徒

據事理疾速斷決不得滯淹久雨未晴恐至淹抑
四年七月壬午勅時雨稍愆慮傷時稼分命朝臣禱
崇諸神

末帝清泰元年六月丙子諸內外差官祈雨自去年
秋不雨冬無雪帝初至至德宮雨數寸至是旱京師
暵苑十數人帝命韓昭裔開廣化寺三藏塔是夕雨
至三寸丁酉以久旱京師酷熱自七日至十三日暵
死者數百道路死者相望帝深憫惻日遣中使往龍
門廣化寺禱雨百僚奔走祠宇至十三日雨四寸
七月己亥分命宰臣百僚諸祠廟祈雨甲辰幸龍門

佛寺禱雨至晚還宮又詔以京畿旱遣供奉官賀守
圖湯王廟取聖水澤州西界有析城山山巔有池水
側有湯廟土人遇旱取水禱雨多驗先是帝憂旱甚
房嵩言聖水可以致雨故也

八月甲申詔曰霖雨稍頻慮妨收穫分命朝臣諸祠
宇祈晴乙未詔曰苦雨連綿已逾旬浹差官祈崇尚
未晴明宜令宰臣李愚劉昫盧文紀姚顛各於諸寺
觀虔告自十一日後霖不止至是日稍霽

九月己亥詔曰久雨未霽禮有祈禳崇都城門三日
不止乃祈山川告宗廟社稷宜令太子賓客李延範

等祭諸城門太常卿李憚工部尚書崔居儉告宗廟社稷甲辰詔曰霖霪稍甚愆伏為災朕燭理不明慮傷和氣都下諸獄委御史臺差官慮問西都差留守判官藩鎮差觀察判官刺史州委軍亭判官諸縣委令錄據見繫罪人一親自錄問恐姦吏逗留致其滄抑畫時疎理如是大獄即具奏聞癸卯司天監靈臺郎李德舟以霖雨為災獻唐初太史令李淳風祈晴法天皇大帝北極北斗壽星九曜二十八宿天水三官五嶽神又有陪位神五嶽判官五道將軍風伯雨師名山大川醮法用紙錢馳馬有差詔曰李德

舟顯陳藝術特貢卦章以霖雨之為災恐染盛之不稔請修祈醮以示消穰恭以天地星辰宗廟社稷兩師風伯皆遵祀典薦告不虧名山大川屢行祈禱今據德舟所陳據祠禱不該者所司嚴潔祠祭以表精虔

十一月辛亥詔曰朕君於人上燭理不明自冬初迄今未降密雪虞愆伏災及黎民宜令宰臣百寮分詣諸祠壇祈告

十二月戊子以自冬無雪詔宰臣盧文紀祈嵩嶽夷寅幸龍門廣化寺開無畏塔祈雪自卯至申時還官

又侍御史陳保極上疏玄冬告謝密雪未零竊慮今夏龍德啓圖鑾旌赴闕擁十萬衆臨九重城讐怖龍神震驚方位致瘥札爲沴風雨失時請在京諸寺觀置週年消災資福安土地龍神道場優詔從之甲午詔曰李元龜官處法司次當候對以稍憊於時雪請特降於優恩初則以貶謫官亡歿外州乞容歸葬次則以亡歿者兒孫絕嗣請本處瘞埋宜依所陳爰告諸道時元龜爲刑部郎中上言以開成格凡貶官降本處春秋以存亡報省如歿於貶所有骨肉許歸葬如無骨肉本處便與葬埋故有是命二年三月丙申詔宰臣姚顛告嵩嶽存丞陳韜光告

亳州太清宮祈雨

四月壬午以京畿旱命宰臣盧文紀告太微宮太廟姚顛告嵩嶽七月戊辰以京師蓄雨遣左武衛將軍穆延輝嵩山祈晴

九月乙酉京師以大雨霖祈晴

十二月癸未詔曰陰陽爽候時雪稍憊分命臣僚請祠廟祈請

三年正月戊戌以自去冬少雪幸龍門廣化寺開無畏師塔祈禱三月庚寅詔曰時雨稍憊宜分命朝臣祠廟祈禱

五月庚午詔曰時雨稍愆頗傷農稼分命朝臣祈禱
居數日以庶官禱請不虔乃命宰臣盧文紀禱太微
宮姚顛崇道官馬裔孫清宮嵩嶽又無雨帝問宰臣
愆伏之故文紀等奏曰愆伏之本洪範有其說若考
較往代理義相違臣等思之此蓋時數若求於政失
則兵戰之氣生陰霖擾攘之氣生蝗旱稍近理也自
頃皇祚甫寧徵求過當雖宸念疾心事不獲已無足
論其變沴也帝俛首而已

七月丁亥同華言自夏不雨京畿旱遣供奉官杜紹
懷徃析城山取聖水

晉高祖天福元年十二月辛卯以自秋不雨經冬無
雪命羣官散禱山川

二年十二月甲辰宰相國寺祈雪

四年六月己亥司天臺奏七月一日太陽有虧缺於
北極於東於南未盈而沒太常禮官詳舊制日有變
天子素服避殿太史以所司救日於柱陳五嶽五鼓
麾東戟南矛西弩北楯中央置鼓服從其位百職廢
務素服守司重列於庭每等異位向日而立明復而
罷今所司法物或不能具且去歲正旦日有食之唯
謹藏兵伏皇帝避正殿尚素食百官守司而已中奏

欲行近禮從之

十二月丁巳帝御便殿謂馮道曰大雪害民五旬不止京城之下十八神祠六寺二觀悉令祈禱了無其驗得非朕之涼德不儲神休者乎道對曰陛下克己恭儉無荒無怠推恩四海必合天心但愛民慎刑始終如一雖星宿之變水旱之沴亦將警聖人而成其德也帝曰朕聽斷有誤卿當再三正之安靜小心共相保守因令出薪炭米粟給軍士貧民等

七年三月壬戌以春旱分命朝臣諸寺觀神祠禱雨丁丑詔宰臣馮道等於開元諸寺及紫極宮祈雨

少帝天福八年五月癸巳勅以久愆時雨遣宰臣馮道等諸寺觀虔祈其餘祠廟仍下開封府徧差官禱之甲辰勅以飛蝗作沴膏雨久愆應三京鄴都諸道州府見禁囚人除十惡行劫諸殺人者及偽行印信合造毒藥官與犯賊外罪者減一等餘並放內有欠官錢者宜令三司酌量與限監出徵理乙巳宰相國寺祈雨

六月庚戌宣差侍衛馬軍都指揮使李守貞以蝗爲害徃臯門村祭告丁巳宣遣供奉官衛延韜嵩山投龍祈雨壬戌宣供奉官朱彥威等七人各部領奉國

兵士一指揮於封丘長垣陽武浞儀酸棗中牟開封等縣捕蝗又遣內班秦宗超亳州太清宮祈雨

開運元年九月詔曰朕虔承顧命獲嗣丕基常懼顛危不克負荷宵分日昃罔敢怠荒夕惕晨興每懷祗畏但以恩信未著德教未敷理道不明咎徵斯至向者頻年災沴稼穡不登萬姓饑荒道殣相望上天垂譴涼德所招仍屬干戈尚與邊陲多事倉廩不足則輟人之饑食帑倉不足則率人之資財兵士不足則取人之中丁戰騎不足則假人之乘馬雖事不獲已而理將若何訪聞差去使臣殊乖體認不能敦於勉

諭而乃臨以威刑自有所聞益深愧悼旋屬守臣叛命戎虜犯邊致使甲兵不暇休息軍旅有戰征之苦人民有飛輓之勞疲瘵未蘇科斂尚急言念于此寢食何安得不省過興懷側身罪已載深戒損思召和平所宜去無用之資罷不急之務棄華取實惜費省功一則符先帝慈儉之規一則慕前王樸素之德何者造作軍器破用稍多但取堅剛不須華靡今後作坊製造器械不得更用金銀裝飾比於遊畋素非所好凡諸服御尤欲去奢應天下州府不得以珍寶玩好及鷹犬爲貢在昔聖帝明君無非惡衣菲食况予

薄德所合恭行今後太官嘗膳減去多品衣服帷帳
務去華飾在禦寒濕而已峻宇雕墻昔人攸誠玉杯
象箸前代所非今後凡有管繕之處丹堊雕鏤不得
過度官闈之內有非理費用一切禁止於戲繼聖承
祧握樞臨極昧於至道若履春冰屬以天災流行國
步多梗因時致懼引咎推誠期於將來庶幾有補更
賴王公將相貴戚豪宗各啟乃心率繇茲道共臻富
庶以致康寧凡百臣僚宜體朕意

三年二月壬戌勅令以漸及春農久憊時雨深慮因
害或有滯淹宜卹刑章甫召和氣其諸道州府見禁
人等並須據罪輕重疾速斷遣仍限半月內有斷遣
訖奏

四月己未以久旱命宰臣趙瑩與羣官禱雨戊寅帝
幸相國寺祈雨

漢隱帝乾祐元年四月庚辰朔以自春不雨勅青州
收瘞用兵討楊光遠時骸骨丁亥以旱幸道官佛寺
禱雨賜僧道帛有差未時還官

正月戊午勅以旱分命羣官於諸寺觀神祠祈雨
七月乙卯以久旱帝幸道官佛寺禱雨仍分命羣官
祈諸神祠賜僧道帛有差日晚還官玄雲四布猛風

北至俄而澍雨尺餘人情熙熙

周太祖廣順二年夏四月戊子勅以旱分命羣臣於諸祠廟祈禱雨

三年正月丁卯以自去冬京師無雪是日分命朝臣於祠廟祈禱

冊府元龜

淮南李嗣京參閱

西極文翔鳳訂正

豫章黃國琦較釋

帝王部 一百四十六

部下第一

周官大司徒之職以慈幼養老賑窮恤貧寬疾之道佐天子保安萬民傳亦云孤獨矜寡天民之窮而無告者也皆有常餼蓋任天下之重司生民之命一夫不獲其所若已推之溝中斯堯舜之用心也中代而

下哲王繼踵取憲前軌勤恤人隱乃有哀其惇獨軫其凶沴賜穀帛以助其養葺廬舍以寧其居流徙者加之存撫夭札者與之藏歛復丁年以待老寬鄉遺以利民獸爲暴者爲之驅除行所過者賦以直物蒐狩之所及戒其侵暴寒暑之造厲資以醫藥以至群司百執恪居朝夕或畏景流爍嚴飈栗烈塗潦沮洳亦免其朝謁斯皆在人上者厚下安宅表微側隱之至也詩曰芻矣富人哀此惇獨易所謂損上益下民說無疆者是之謂歟

漢文帝十三年六月賜天下孤寡布帛絮各有數

景帝元年正月詔曰間者歲比不登民多乏食天絕

天年朕甚痛之郡國或磽陿無所農桑穀畜

磽謂磽确瘠薄

也陿隘也般謂食養之也畜牧放也

廣薦草莽水泉利而不得從

麋鹿食日

薦一日草稠日薦深日莽

其議民欲徙寬大地者聽之

武帝元狩元年四月詔朕哀夫老眊孤寡鰥獨

八十日眊

老稱也一日眊不謂之貌

或匱於衣食甚憐愍焉其遣謁者巡行

天下存問致賜

致送至也

九十已上及鰥寡孤獨帛人二

疋絮二斤八十已上家人三石

六年六月遣博士六等六人

稽大也

分循行天下存問

鰥寡廢疾無以自振業者貸與之

元封元年十月行所巡至博奉高蛇丘歷城梁父加
年七十已上孤寡帛人二疋

二年春幸緱氏遂至東萊四月還祠泰山至瓠子臨
決河賜所過孤獨高年米人四石

六年三月幸汾陰祠后土神光三燭賜天下貧民布
帛人一疋

太始三年二月行幸東海琅琊登之罘浮大海賜行
所過戶五千錢鰥寡孤獨帛人一疋

昭帝始元四年七月詔曰比歲不登民匱於食流庸

未盡還

流庸謂云其本鄉
而行爲人庸作

往時令民共出馬其止勿

出諸給中都官者且減之

元鳳二年六月詔曰朕閱百姓未贍前年減漕三百

萬石頗省乘輿馬及苑馬以補邊郡三輔傳馬其令

郡國毋歛今年馬口錢

所謂租及
六畜也

宣帝地節三年三月詔曰鰥寡孤獨高年貧困之民

朕所憐也前下詔假公田貸種食其加賜鰥寡孤獨

高年帛二千石嚴教吏謹視遇母令失職

職常也失
職謂失其

常業
也

四年九月詔曰朕惟百姓失職不贍遣使者循行郡
國問民所疾苦吏或營私煩擾不顧厥咎朕甚閱之

今年郡國頗被水災已賑貸鹽民之食而賈咸貴衆重困其減天下鹽賈

元康元年三月以鳳凰集泰山甘露降未央宮賜鰥寡孤獨高年

二年三月以鳳凰甘露降集賜天下鰥寡孤獨高年

三年春以神爵數集泰山賜鰥寡孤獨高年帛

四年三月詔以神爵集長樂未央宮賜鰥寡孤獨帛各一疋

神爵元年三月改元賜鰥寡孤獨高年帛

四年二月以修興泰一五典后土之神神光顯著賜鰥寡孤獨高年帛

五鳳三年三月以鸞鳳又集長樂宮加賜鰥寡孤獨高年帛一

元帝初元元年四月賜鰥寡孤獨帛人二疋

五年四月賜鰥寡孤獨帛人二疋

永光二年三月賜鰥寡孤獨高年帛

三年三月賜鰥寡孤獨高年帛

四年十月詔曰安土重遷黎民之性骨肉相附人情所愿也頃者有司緣臣子之義奏徙郡國民以奉園

陵令百姓遠棄先祖墳墓破業失產親戚別離人懷
思慕之心家有不安之意是以邊陲被虛耗之害關
中有無聊之民非久長之策也詩不云乎民亦勞止
汙可小康惠此中國以綏四方今所為初陵者勿置
縣邑使天下咸安土樂業亡有動搖之心有告天下
令明知之

五年秋潁川水出流殺人民吏從官縣被害者與告
從官即上侍從之官也言凡為吏
為從其官本縣有被害皆與休告士卒遣歸

成帝建始元年三月賜鰥寡孤獨錢帛各有差

河平四年三月遣光祿大夫博士嘉等十一人行舉

灑河之郡

巡行而舉其狀灑水
也灑河言傍河也

水所毀傷困乏不能

自存者財振貸

財與裁同謂量其
等差而賑貸之

其為水所流壓死

不能自葬令郡國給椁槨葬埋

椁漬謂
小棺

已葬者與錢

人二千避水它郡國在所冗食之

冗散稟食使役生
活不占著戶給役

役也謹遇以文理無令失職

陽朔二年秋關東大水詔流民欲入函谷天井壺口

五阮關者勿苛留

天井在上黨高都壺口在壺
關五阮在代都苛細刻也

遣諫

議大夫博士分行視

鴻喜元年二月詔加賜鰥寡孤獨高年帛

四年正月詔水旱為災關東流冗者眾

冗散失其
事業也青

幽冀部尤劇朕甚痛焉已遣使者循行郡國流民欲入關輒籍內錄其名籍而內之所之郡國謹遇以理之性務也有以全活之恩稱朕意

哀帝以綏和二年四月卽位是年秋詔曰迺者河南潁川郡水出流殺人民壞敗廬舍遣光祿大夫循行舉籍舉其名籍賜死者棺錢人三千

平帝元始二年四月郡國大旱民疾疫者舍空邸第為置醫藥舍止也賜死者一家六尸以上葬錢五千四

尸以上三千二尸以上二千起官寺市里募徙貧民縣次給食至徙所賜田宅什器假與犁牛種食又起

五里於長安城中民居之里宅二百區以居貧民

四年二月賜天下鰥寡孤獨高年帛

後漢光武建武六年正月詔曰往歲水旱蝗虫為災穀價騰踊言踊貴也人用困乏朕惟百姓無以自贍惻然

愍之其命郡國有穀者給廩廩賜穀也高年鰥寡孤獨及老癯無家屬貧不能自存者如律漢律令云二千石勉加

循撫無令失職

二十二年九月詔曰日者地震南陽危甚賜郡中居人歷死者棺錢人三千吏人死亡或在壞垣毀屋之處而家羸弱不能收拾者其以見錢穀取備為尋求

之

二十九年二月丁巳朔日有食之賜天下鰥寡孤獨老癯貧不能自存者粟人五斛

三十年五月大水賜天下鰥寡孤獨老癯貧不能自存者粟人六斛

明帝永平二年十月行養老禮詔有司其存者耆耄幼孤惠鰥寡稱朕意焉

三年二月立皇太子賜天下鰥寡孤獨老癯貧不能自存者粟人五斛

十二年五月賜天下鰥寡孤獨老癯貧無家屬不能

自存者粟人三斛

十七年五月賜天下鰥寡孤獨老癯貧不能自存者粟人三斛

十八年四月詔自春已來時雨不降宿麥傷旱秋種未下其賜天下鰥寡孤獨老癯貧不能自存者粟人

三斛

章帝以永平十八年八月即位十月大赦賜鰥寡孤獨老癯貧不能自存者粟人三斛

建初元年正月詔三州郡國方春東作恐人稍受廩往來煩劇或妨農耕廩給也稍謂少少給之不煩與也其各實覈尤

冊府元龜 卷之四百四十六
貧者計所貸并與之流人欲歸本者郡縣其實廩令足還到聽過止官亭無孤舍宿長吏親躬無使貧弱遺脫小吏豪右得容姦妄詔書既下勿得稽留刺史明加督察尤無狀者

三年三月立皇后賜鰥寡孤獨老癯貧不能自存者粟人五斛

四年四月立皇太子賜鰥寡孤獨老癯貧不能自存者粟人五斛

元和元年二月詔曰自告疫以來穀食連少其令郡國募人無田欲徙地界就肥饒者恣聽之到在所賜

給公田爲雇耕傭賃種餽

餽糧也與餉同

賞與田器勿收租

五歲除美三年其後欲還本鄉者勿禁

三年正月詔曰蓋君人者視民如父母有憐恤之愛有忠利之教匍匐之救其嬰兒無父母親屬及有子不能養食者廩給如律

和帝永元三年十月行幸長安賜行所過鰥寡孤獨篤癯貧不能自存者粟人三斛

五年二月詔曰去年秋麥入少恐民食不足其上尤貧不能自給者戶口人數往者郡國上貧民以衣履金鬻爲貲而豪右得其饒利

方言曰顧自闕而東謂之鬻貧人既計釜餽以

為貲財懼於役重多即賣之以避利
稅豪富之家乘賤買故得其饒利 詔書實覈欲有

以益之而長吏不能躬親及更徵召會聚令失農作
愁擾百姓若復有犯者二千石先坐

八年二月立皇后賜天下鰥寡孤獨篤癯貧不能自
存者粟五斛

十二年二月詔賜被災諸郡鰥寡孤獨不能自存者
及郡國流民聽人陂池漁採以助蔬食

三月詔曰比年不登百姓虛匱匱乏也京師去冬無宿

雪以其經冬故言宿也今春無澍雨黎民流離困於道路其賜

鰥寡孤獨老癯貧不能自存者粟人三斛

十五年閏正月詔流民欲歸還本而無糧食者所過

實廩之疾病加致醫藥其不欲還歸者勿強

元興元年十二月立皇太子賜天下鰥寡孤獨老癯
貧不能自存者粟人三斛

安帝永初元年十一月勅司隸較尉冀并二州刺史

民訛言相驚棄損舊居老弱相携窮困道路其各勅
所部長吏躬親曉諭若欲歸本郡在所為封長檄不

欲勿強封謂印封之也長檄猶今長牒也欲歸者皆給以長牒為驗

元初六年二月詔曰夫政先京師後諸夏月令仲春
養幼小存諸孤季春賜貧窮賑乏絕省婦使婦使謂
組紐之

事 表貞女所以順陽氣崇生長也其賜尤貧困孤弱
單獨穀人三斛

四月會稽大疫遣光祿大夫將太醫循行疾病死者
賜棺木除田租口賦

永寧元年四月賜鰥寡孤獨貧不能自存者穀人三
斛

十一月郡國三十五地震或拆裂遣光祿大夫按行
賜死者錢人二千

延光元年三月改元大赦加賜鰥寡孤獨老癯貧不
能自存者粟人三斛是歲京師及郡國二十七雨水

大風殺人詔壓溺死者年七歲以上錢人二千其壞
廬舍已失穀食粟人三斛若一家人皆災害而幼小
存者郡縣爲收歛之

順帝永建元年正月大赦賜鰥寡孤獨老癯貧不能
自存者粟人五斛

二年二月詔荆豫兗冀四州流冗貧人所在安業之
疾病致醫藥

三年正月京師地震漢陽地裂詔實覈傷旱者賜年
七歲已上錢人二千一家被害郡縣爲收歛

四年正月帝加元服賜鰥寡孤獨老癯不能自存者

帛人一疋

八月以五州雨水遣使實覈死亡收歛廩賜

陽嘉元年正月立皇后賜鰥寡孤獨老癯貧不能自存者粟人五斛

十一月甲申望都蒲陰狼殺女子九十七人詔賜狼所殺者錢人三千

永和二年十月行幸長安所過鰥寡孤獨貧不能自存者賜粟人五斛

三年二月京城及金城隴西地震山摧地陷遣使按行三郡賜壓死者七歲以上錢人二千一案皆被害

為收歛之

建康元年正月辛丑詔曰隴西漢陽張掖北地武威武都自去年九月已來地百八十震山谷折裂壤敗城寺殺害民庶夷狄叛逆賦役重數內外怨曠惟咎歎息其遣光祿大夫按行宣暢恩澤惠此下民勿為煩擾

質帝本初元年二月庚辰詔曰九江廣陵二郡數罹寇害殘夷最甚生者失其資業死者暴尸原野昔之為政一物不得其所若已為之况我元元嬰此困苦方春戒節賑濟之厄掩骼埋胔之時其調北郡見殺

出廩窮弱收葬骨骸務加理郵以稱朕意五月海水
溢使謁者按行收葬樂安北海人為水所漂沒死者
恒帝建元元年正月大赦賜鰥寡孤獨老癯貧不能
自存者粟人五斛

三年十一月詔曰朕攝政失中災眚連仍三光不明

陰陽錯序監寤寐歎疚如疾首

監寐言雖寢而不寐也寤覺也今京

師廝舍死者相枕郡縣阡陌處處有之甚違周文掩
骼之義其有家屬而貧無以葬者給直三千喪主布
二疋若無親屬可於官墻地葬之表識姓名為設祠
祭又徙在作部疾病致醫藥死亡厚埋藏民有不能

自流及振移者廩穀如利州郡檢察務崇恩施以康
我民

元嘉元年正月京師疾疫使光祿大夫將醫藥按行
永興二年六月詔司隸較尉部刺史曰蝗災為害水
變仍至五穀不登人無宿儲其令所傷郡國種蕪菁
以助人食

永壽元年六月雒水溢又南陽大水詔被水死流失
屍骸者令郡縣鉤求收葬及所唐突壓溺物故七歲
已上賜錢人二千

永康元年八月六州大水勃海溢詔州郡賜溺死者

七歲以上錢人二千一家皆被害者悉為收斂

靈帝建寧四年三月大疫使中謁者巡行致醫藥

熹平二年正月大疫使使者巡行致醫藥

光和二年春大疫使嘗侍中謁者巡行致醫藥

魏明帝太和六年三月癸酉東巡所過存問高年鰥

寡孤獨賜穀帛

晉武帝太始七年六月大雨霖伊維河溢流居人四

千餘家殺三萬餘人有詔賑貸給棺

咸寧二年七月河南魏郡暴水殺百餘人詔給棺

三年三月帝將射雉慮損苗而止

太康元年三月改元大赦詔恤孤老困窮

惠帝永平元年五月賜鰥寡孤獨帛人三疋

明帝太寧三年三月立皇太子賜鰥寡孤獨帛人二

疋

成帝咸和元年二月改元大赦賜鰥寡老孤米人二

斛

康帝建元元年正月改元賑恤鰥寡孤獨

魏帝升平元年八月立皇后賜鰥寡孤獨米人五斛

五年五月戊戌大赦賜鰥寡孤獨不能自存者粟人

五斛

海西公太和六年四月賜窮獨米五斛

簡文帝咸安元年十一月卽位賜鰥寡孤獨米人五

斛

孝武帝太元五年六月以比歲荒儉大赦其鰥寡孤獨老不能自存者人賜米五斛

安帝義熙元年正月賜鰥寡孤獨穀人五斛

後魏道武天興元年正月庚子自中山行幸嘗山之真定次趙郡之高邑遂幸於鄴民有老不能自存者詔郡縣賑恤之

太武太延元年二月詔長安及平涼民徙在京師其孤老不能自存者聽還鄉里

三年二月幸幽州存孤老問民疾若

獻文皇興四年三月詔曰朕思百姓病苦民多非命明發不寐疚深疾首是以廣集良醫遠採名藥欲以救護兆民可宣告天下民有病者所在官司遣醫就家診視所須藥物任醫量給之

孝文延興三年九月詔曰今京師及天下囚未判在獄致死無近親者給衣衾棺槨葬之不得暴露太和三年十一月賜京師貧窮高年疾患不能自存者衣服布帛各有差

五年二月大赦賜窮孤不能自存者穀帛各有差

六年三月辛巳幸武州山石窟寺賜窮老者衣服

四月甲申賜畿內鰥寡孤獨不能自存者粟帛有差

七年四月壬子幸崞山賜所過鰥寡不能自存者衣

服粟帛

十二年正月詔曰鎮城流徙之人年滿七十孤單窮

獨雖有妻妾而無子孫諸如此等聽解名還本諸犯

死刑者父母祖父母年老更無成人子孫旁無耆親者

具狀以聞

十三年四月詔曰昇樓散物以資百姓至使人馬騰

踐多有毀傷今可斷之以本所費之物賜窮老貧獨
者

十七年七月立皇太子賜鰥寡孤獨不能自存者粟

人五斛

九月幸并州詔雒懷并肆所過四州恤鰥寡孤獨各

有差

十八年正月南巡詔相兗豫三州鰥寡孤老各有差

八月幸懷朔武川撫寘柔玄等四鎮間人疾苦貧窘

孤老者賜以粟帛又詔禦夷城人年滿七十已上及

廢疾之徒較其元犯以准新律事當徒坐者聽一身

還鄉又令一子扶養終命之後乃遣歸邊自餘之處如徒之犯年八十已上皆聽還

十一月詔冀定二州恤鰥寡各有差

十二月南伐詔郢豫二州恤鰥寡孤老各有差

十九年四月曲赦徐豫二州恤孤寡老疾各有差

六月南伐還詔車駕所經者恤孤寡老疾各有差

十月幸鄴還詔曲赦相州恤孤老痼疾各有差

二十年七月丁亥詔疾苦六極人神所矜宜時訪恤以窮廢鰥寡困乏不能自存者明燻矜恤令得存濟

又詔夫婦之道生民所先仲春奔會禮有違式男女

失時者以理會之

二十一年五月幸長安還汎渭入河詔孤寡鰥貧爲

賜穀帛

九月丙申詔曰哀窮恤老王者所先鰥寡六疾尤宜

矜愍可勅司州雒陽之民年七十已上無子孫六十

已上無期親貧不能自存者給以衣食及不滿六十

而有廢痼之疾無大功之親窮困無以自療者皆於

別坊遣醫救護給太監帥四人豫請藥物以療之

宣武景明二年三月詔曰比年以來連有軍旅役務

既多百姓凋弊宜時矜量以拯民瘼正調之外諸坊

冊府元龜 郵下 卷之三百四十一
調損民一時蠲罷

永平三年十月詔曰朕乘乾御曆年周一紀而道謝擊壤教慙刑厝至於下民之災鰥疾苦心常愍之此而不恤豈爲民父母之意也可勅太常於閑敞之處別立一館使京畿內外疾痼之徒咸令居處嚴勅監署分師療治考其能否而行賞罰雖齒數有期脩短分定然三疾不同或賴針石庶秦扁之言理驗今日矣又經方浩博流傳處廣應病投藥率難窮究更令有司集諸醫工尋篇推簡務存精要取三十餘卷以班九服郡縣備寫布下鄉邑使知救患之術耳

延昌元年四月詔曰肆州地震陷裂死傷甚多言念毘沒有酸懷抱亡者不可復追生病之徒宜加療救可遣太醫折傷醫并給所須之藥就治之

六月詔曰去歲水災今春炎旱百姓饑餒救命靡寄雖經蠶月不能養績今秋輸將及郡縣其於責辦尚書可嚴勒諸州量民貲產明加檢簡以救艱敝

二年十二月詔以鎮肆地震人多罹災其有課丁役盡老幼單立家無受復各賜廩米以接來稔

孝明熙平元年十二月詔雒陽河陰及諸曹雜人年七十已上鰥寡貧困不能自存及年雖少而痼疾長

廢窮若不濟者宰司研實具列以奏聞

神龜元年正月詔賜京畿及諸州鰥寡孤獨粟帛

出帝太昌元年五月丁未詔曰無侮悖獨事炳前經
惠此鰥寡聲留往册朕以薄德作民父母乃眷元元
寤言增歎今理運惟新哀矜伊始如有孤老疾病無
所歸依者有司明加隱括依恪賑贍

後周明帝武成元年六月大霖雨詔遭水者有司時
巡檢簡條例以罰

武帝建德三年十月詔蒲州民遭饑交絕者令向郿
城以西及荊州管內就食

六年二月平齊詔曰母侮乳獨事顯前書哀彼矜人
惠流徃訓僞齊末政昏雩實繁哭甚稽天毒流比屋
無罪無辜係虜三軍之手不飲不食僵仆九達之間
朕爲民父母職養黎人甚念泣辜誠深罪已除其苛
政事屬改張宜加寬宥兼行賑卹其癯殘孤老饑餒
絕食不能自存者仰刺史守令及親民長司躬自檢
較無親屬者所在給其衣食務使存濟

隋高祖開皇十四年八月關中大旱人饑行幸雒陽
因令百姓山東就食從官竝准見口賑給不以官位
爲限

十二月東巡狩關中戶日就食雞陽者道路相屬帝
勃斥候不得輒有驅逼男女參廁於仗衛之間遇逢
扶老攜幼者輒引馬避之慰勉而去至艱險之處見
召擔者遽令左右扶助之

册府元龜

淮南

西極女翔鳳訂正

豫章黃國琦較釋

帝王部

一百四十七

恤下第二

唐高祖武德元年五月卽位詔鰥寡孤獨量加賑恤
七月巳酉詔曰隋政不綱行止無度東西奔騁靡歲
獲寧遂使父子乖離室家分析親老絕晨昏之養嬰
孩無撫育之恩人懷戀本之心家有望鄉之歎朕上

膺靈命下字黔黎一物失宜情深軫悼思禪惠澤逮于鰥寡其隋代公卿已下爰及民庶身往江都家口在此不預義軍者所有田宅並勿追收若有困窮糧食交絕具錄名簿速加賑贍

四年六月庚寅詔鰥寡孤獨以時恤理

七月丁卯大赦詔高年憚獨量加賑恤

六年三月詔曰詩不云乎民亦勞止汔可小康自有隋失馭政刑版蕩豺狼競起肆行暴虐徵求無度侵奪任已下民困擾各靡聊生喪亂之餘百不存一上天降監爰命朕躬廓定凶災又寧區域念此黎庶凋

弊日久新獲安堵衣食未豐所以每給優復蠲減徭賦不許差科輒有勞役義行簡靜使務農桑至如大河南北離亂永久師旅薦興加之饑饉百姓勞弊此焉特甚江淮之間爰及嶺外塗路懸阻土曠民稀流寓者多尤宜存恤此等諸處徃隔寇戎自經開泰歲月未久猶恐士民積習不改前弊州縣官人未稱所委迎送往來尚致勞費其河北江淮以南及荊州大總管向西諸州所司宜便班下自今以後非有別勅不得輒差科徭役及迎送供承庶令安逸明加簡約稱朕意焉

冊府元龜 恤下
四月詔曰隋末喪亂豺狼競逐率土之衆百不存一
干戈未靜桑農成廢凋弊之後饑寒重切永言於此
悼于厥心今寇賊已平天下無事百姓安堵各務稱
職家給人足卽事可期所以新附之民特蠲徭賦欲
其休息更無煩擾使獲安靜自脩產業猶恐所在州
縣未稱朕懷道路迎送廨宇營築率意徵求擅相呼
召諸如此例悉宜禁斷非有別勅不得差科不如詔
者重加推罰布告天下咸知此意
太宗以武德九年八月卽位詔鰥寡孤獨不能自存
者量加優恤

貞觀元年二月詔曰昔周公治定制禮垂裕後昆命
媒氏之職以會男女每以仲春之月順時行令蕃育
之理旣弘邦家之化攸在及政教凌遲諸侯力爭官
失其守人變其風致使謬俗有失時之譏鰥寡無自
存之術漢魏作教事非師古道隨世隱義逐時乖重
以隋德淪胥數鍾迪剝五都俱覆萬方咸蕩暨參墟
奮旅救彼難危區縣削平總斯圖籍顧瞻禹跡提封
尙存乃眷周餘掃地咸盡痛心疾首寤寐無忘蓋惟
上玄之大德曰生蒸民以最靈爲貴一經喪亂多餌
豺狼朕肅奉天命爲之父母平定甫爾劬勞未堪厚

生樂業尚多踈簡永言亭育用切於懷若不申之以
婚姻明之以顧復便恐中饋之禮斯廢絕嗣之釁方
深有懷怨曠之情或致淫奔之辱憲章典故實所庶
幾宜令有司所在勸勉其庶人男女之無室家者並
仰州縣官人以禮聘娶皆任其同類相求不得抑取
男年二十女年十五已上及妻喪達制之後孀居服
紀已除並須申以媒媾令其好合若貧窶之徒將迎
匱乏者仰於其親近及鄉里富有之家哀多益寡使
得資送以濟其鰥夫年六十寡婦年五十已上及婦
人雖尚少而有男女及守志貞潔者並任其情無勞

抑以嫁娶

七月詔曰周氏設官分掌邦事漢家創制允定章程
故使百工咸理五材異用雖沿革有時而此塗莫爽
但欽明之后役自子來昏亂之朝期盡民力或祁寒
隆暑未獲小康或俾夜作明繼之以燭淫費不已凋
喪為期朕祇奉明命撫臨億兆愛育之心發於寤寐
每咨謀卿士詢訪芻蕘何嘗不以節儉為懷憂矜在
念自非田疇耘獲軍國資須未曾別使一人輒求一
物每有丁匠之所常申戒作之司令其寬大功程務
從閒逸少府僦屬莫不聞知而營造矛鎧催督非理

竭人之力以求已功朝夕左右尚乘期約遠方勞役何以克堪雖四海之內無餘經始然繕治器械脩葺城隍及隄防浸決橋梁壞毀事不獲已必藉人功須慮徠民心緩其日用宜班告天下知朕意焉

六年三月幸九成宮詔岐雍幽三州行經之所鰥寡憚獨賜以粟帛

九月三月大赦鰥寡憚獨不能自存者所在官司量加賑恤

十年關內河東疾病醫齋藥療之

十一年二月幸維陽宮詔從兵有父母年八十已上

者悉罷遣

七月詔曰維陽宮室創自有隋朕因其成功無所改作今屋宇湮壞者宜量加脩葺使纒充居處自外材木宜分賜維州廓內貧民因水損居宅者是月以廢明德宮之玄圃院分給河南維陽遭水者

十三年正月朝獻陵詔鰥寡憚獨有篤疾者賜物各有差

十五年正月幸維陽詔從行士卒家貧親老者並放還所過賜高年篤疾穀帛有差

三月戊辰如襄城宮澤州疾疫遣醫就療

十六年夏穀涇徐貌戴五州疾疫遣賜醫藥焉

十七年四月中即將李安儼與太子承軋謀反誅籍沒其家其父年九十餘太宗愍焉特賜奴婢以養之閏六月潭濠廬三州疾疫遣醫療焉

十八年自春及夏廬濠巴普郴疾疫遣醫往療

二十一年十二月大寒帝謂侍臣曰朕在九重之內身御裘裘且將臨朝猶覺氣之嚴厲况臣下遠趨北闕蒙犯霜露乎朕思若此遂減衣裘而出

二十二年九月邠州大疫詔醫療之

高宗永徽元年六月新豐南大雨零口山水暴出漂

廬舍溺死者九十餘人詔給死者絹布三疋仍給棺瘞埋之乏絕者給資之宣歙饒常等州暴雨水漂殺四百餘人詔爲瘞埋仍給貸之

六年六月辛丑商州山水漂壞居人廬舍遣使存問之

顯慶元年七月己卯宣州涇縣山水暴漲高四丈餘漂蕩村落溺殺二千餘人制賜死者物各五段廬舍損壞者量爲營造并賑給之

十一月饒州火焚州城廨宇倉獄延燒居人廬舍有死者詔給死者家布帛以葬之

四年七月連州山水暴漲漂沒七百餘家詔鄉人爲造宅宇仍賑給之

龍朔二年十二月詔曰海東二蕃久愆職貢近者命師薄伐軍務事殷緣河州縣勞於征役比雖多有蠲免庶事優矜萬邦俱會致恐煩擾勞逸二途理無兼途介立大禮及幸東郡並宜立停

總章二年九月海水泛溢壞永嘉安固二縣墾居人廬舍六千餘家遣使脩葺宅宇溺死者各賜物五段咸亨元年八月以天下四十餘州旱及霜虫百姓饑乏關中尤甚詔雍同華蒲絳五州百姓乏絕者聽於

興鳳梁等州逐糧

十月詔貧窶之家有年十五已下親屬不能收養者並聽爲男女及驅使京官六品以下情願將家口歸本貫及往豐熟之處並聽之

上元三年八月青州大風海水泛溢漂擯居人廬宅五千餘家齊淄等七州大水詔賑貸貧乏溺死者賜物埋殯之舍宅壞者助其營造

鳳儀三年四月以同州饑沙苑及長春宮並許百姓樵採漁獵

永隆元年秋河南北諸州大水詔遣使分往存問其

漂溺死者各給棺槨仍贈其物七段屋宇破壞者勸課鄉閭助其脩葺糧食乏絕者給貸之

二年八月河南河北大水詔溺死者各贈物三段中宗神龍元年四月雍州同官縣大雨雹鳥獸死及大水漂流居人四五百家遣員外郎一人巡行賑給被溺死者官爲埋殮

七月雒水瀑漲壞人廬舍二千餘家溺死者數百人令御史存問賑卹官爲瘞埋

景龍二年三月築朔方軍城四月以兵匠有疾病者令醫人齎藥巡療

玄宗先天二年五月詔曰卑宮致美愛人之力靈臺罷營重費之廣景彼前烈吾無聞然頃以所居殿院素非弘敞時方暑雨頗有蒸鬱上稟聖慈式遵時令將脩別寢順彼高居雖復危徒所須止於蕃匠補葺所擬無煩外力然以麥秋爰及農務方勤維戛在辰執役爲弊營之則衆物有勞而一身逸罷之則我躬未泰而萌庶安夫生人樹君將利之也勞人自奉予所不爲其脩大明宮宜卽待至開月方使畢功宣示具察使知予意所有先役工匠卽優還價直勿令懸欠仍卽放散

開元三年七月詔曰古之爲國者藏之於人百姓不足君孰與足比者山東邑郡歷年不稔朕爲之父母欲安黎庶恤彼貧癯拯其流亡靜而思之非不勤矣今者風雨咸若京坻可望若貸糧地稅庸調正租一時併徵必無辦法河北諸州宜委州縣長官勸責灼然不能支濟者稅租且於本州納不須徵却待至春中更別處分有貸糧廻溥等亦量事減徵

四年正月詔曰如聞江淮南諸州大虫殺人村野百姓頗廢生業行路之人嘗遭死失州縣不以爲事遂令猛獸滋多泗州連水縣令李全確前任宣州秋浦縣令界內先多此獸全確作法遮捕掃除略盡迄今人得夜行百姓實賴其力宜令全確馳驛往淮南大虫爲害州指授其教與州縣長官同除其害緣官路兩邊去道各十步草木嘗令芟伐使行人往來得以防備

七年九月詔曰東都道俗有來請駕者東西來去雖則爲嘗每歲來請豈能無擾宜以理告示仍於朝堂賜食卽發遣并勅陸象先莫令更相倣效
八年六月河南府殺雜涯三水泛漲漂溺居人四百餘家壞田三百餘頃諸州當防丁當番衛士掌閑廐

者千餘人遣使賑恤及助脩屋宇其行客溺死者委本貫存恤其家

十年五月東都大雨伊汝等水泛壞河南府及許汝仙陳四州廬舍數千家溺死者甚衆詔河南府巡行所損之家量加賑貸并借人力助營宅屋

十一年七月丁亥勅曰神農嘗草以療人疾岐伯品藥以輔人命朕銓覽古方永念黎庶或榮衛內壅或寒暑外攻因而不救良可歎息今遠路僻州醫術全少下人疾苦將何恃賴宜令天下諸州各置職事醫學博士一員階品同于錄事每州寫本草及百一集

驗方與經史同貯其諸州子錄事各省一員中下州先有一員者省訖仰州補勳散官克帝新製廣濟方頒於天下

十二年三月詔曰河南河北去歲雖熟百姓之間頗聞辛苦今農事方起蠶作就功宜令御史分往巡行其有貸糧未納者並停到秋收

十三年十二月詔曰應緣朕巡行處有損百姓竹樹者所司卽酬其錢

十四年七月以懷鄭許滑衛等州水潦遣右監門衛將軍知內侍省事黎敬仁宣慰如有遭損之處應須

冊府元龜 恤下 卷之五十四
營助賑給竝委使與州縣相知量事處置

九月命御史中丞兼戶部侍郎宇文融往河南河北道遭水州宣撫若屋宇摧壞牛畜俱盡及征人之家不能自存立者量事助其脩葺

十一月詔曰近聞河南宋沛等州百姓多有汭流逐熟去者須知所詣有以安存宜令本道勸農事與州縣檢責其所去及所到戶數奏聞

十五年四月詔曰河南河北諸州去年緣遭水澇雖頻加賑貸而恐未小康言念於茲無忘鑒寐爰自春夏雨澤以時兼聞夏苗非常茂好既卽收穫不慮少

糧然以產業初營儲積未贍若非寬惠不免艱辛其貸糧麥種穀子迴轉變造諸色欠負等竝放候豐年以漸徵納蠶麥事畢及至秋收後竝委刺史縣令專勾當各令貯積勿使妄有費用明加曉諭知朕意焉十六年正月庚申御興慶樓宴群臣下制曰朕昔在藩國此惟邸第乾坤未泰陰陽尚蒙則有神祇効靈祥符肇貺飛隹氣於在田之際湧瑞日於或躍之池惟此舊居式加新宇周墻僅板於百堵卑宮不階於三尺棟樑之用毀徹所餘聊以紀天地之休徵貽子孫之儉約耳屬春令爰始時惟發生萬方來朝千官

入賀旣稱觴以獻壽宜施惠以布德况田農在候稼
穡方興或迫於程徃不遂農桑之務言及於此軫歎
良深其徒已下且令貴保并應當番兵士等灼然卑
貧者所由勤會竝放營農所在訢訟長官隨事踈理
勿使冤滯非軍國所要餘不悉之務一切竝停仍加
勸課脩植農穡其河北水損戶旣屬春事慮有乏絕
不支濟者宜委採訪使與州縣相知量加賑恤諸處
行人之家及鰥寡惇獨不能自存者州縣長官親加
優撫使得存濟應有差科量事矜放宜宣風緝化朕
在令長有司銓擇之次特宜審擇其才惟德與刑爲

政之要頃無聞於風化多取威於櫛楚理人之道其
若是乎愚昧之流或輕抵犯宜加曉諭使識章程其
含生之類不得輒有屠殺天下捕獵亦宜禁斷仍嚴
加捉搦百司各遵時令務弘寬大之典使政理無失
稱朕意焉

二十三年五月詔日如聞關輔蠶麥雖稍勝嘗年百
姓所收纔得自給若無優假還慮艱弊其先欠百司
職田及諸色應合至蠶麥時徵已有處分訖其公私
舊債亦宜停徵貧下百姓有傭力買賣與富兒及王
公已下者任依嘗式

天寶三載八月詔曰育物者所貴於從宜養人者必資於遂性况加疾苦豈忘哀矜內外廊二衛曠騎等如聞因當上染患者番滿之後既不勝致還鄉又不容在職掌將息進退無據何所依投溝壑是憂宜謀朝夕永言及此深軫于懷自今以後如有此色宜移就三衛厨給食料將養各委左右金吾將軍存意簡較所須藥物仍與太常計會量事供擬并差醫人救療其諸門及諸舖職掌人等各移就本衛將養所須食料各委將軍以當衛諸色迴殘官物等且量事支給其醫藥宜准內外廊例自餘諸色當番人等有疾

疾者並准此處分其死者各委所由隨事埋瘞當日牒報本貫令家人親族運致還鄉

五載八月癸未詔曰朕頃所撰廣濟方救人疾患頌行已久計傳習亦多猶慮單貧之家未能繕寫閭閻之內或有不知儻將療失時因致橫天性命之際寧忘惻隱宜令郡縣長官就廣濟方中逐要者於大板上件錄當村坊要路榜示仍委採訪使勾當無令脫錯

十三載二月詔鰥寡惛獨乏絕者量加賑給
肅宗至德元年正月大赦詔左降官非反逆侵坐及

犯惡逆名教枉法強盜賊如有親年八十已上及疾
患在牀枕者不堪扶持更無兄弟許其停官終養其
流人亦准此

乾元元年四月詔曰應緣南郊百司張設有損百姓
苗稼者委京兆尹隨損多少倍酬所損錢物便卽聞
奏

十月詔曰應行營人家及羸老单貧鰥寡憫獨已頗
有處分宜令州縣長官倍加賑恤
上元二年九月詔鰥寡憫獨不能自存立者委刺史
縣令量加賑恤

代宗寶應元年十月乙卯勅曰浙江東西去歲旱損
所出租賦頗甚艱辛今秋已來復聞遭水百姓重困
何以克堪朕所以未明求衣日旰忘食思弘理道良
用疚懷今所徵收唯正租庸而已其餘差役咸使矜
量頗亦申明冀稍安緝如聞諸道節度使不承正勅
妄有徵科州縣望風便行文牒務爲逼迫自應誅求
事且因循轉用生弊不有懲革何以息人自今已後
宜令本道觀察及租庸使嚴加訪察其州縣除正勅
支遣外不得轉承諸使文牒徵率一物已上如或有
犯便仰停務具名彈奏又聞杭越聞疾疫頗甚戶有

死絕未削版圖至於稅賦或無舊業田宅延及親隣
言念疲人豈堪兼役致令逃散誠有哀矜亦委租庸
使與本州審細勘責據實戶差遣處置訖具狀聞奏
仍委刺史縣令設法招攜課最之間褒貶斯在其有
死絕家無人收葬仍令州縣埋瘞朕臨御寰瀛爲人
父母一物失所每勤罪已之心四方未寧彌軫納隍
之慮庶尹卿士友邦冢君宜悉朕懷其敷至理
大曆九年四月制曰其百姓鰥寡孤獨不能存濟者
困窮無主誠可哀傷仰所在州縣府長官每年以諸
色官物量加贍恤令其得所

德宗貞元元年正月詔嘗陷賊百姓屋宇焚毀貧病
老弱咸加優恤

十二年越州刺史皇甫政奏云貞元十年綾縠一千
七百疋至汴州值兵潰叛物皆散失請率新來客戶
續補前數帝謂宰臣曰百姓有業則懷土爲居戶失
業則去鄉爲客戶去鄉者咸遭羅苛暴瘡痍之人豈
可重傷可罷其率特免所失物

十四年閏五月貶太子詹事蘇弁爲汴州錄事參軍
又貶其兄贊善大夫袞爲永州司戶俄降勅曰左降
官蘇袞貶官本緣并連坐矜其年暮加以疾患宜令

所在勒廻任歸私第哀年七十兩目無所見已逾年以弁之故竟未停官及貶帝聞之哀憫故許還家十八年七月詔曰朕獲主兆人以臨方夏憂勤于政思底康寧然而理化未孚水旱為沴或傷壞廬舍漂損田疇朕為人父母用切于衷其諸道應遭水損州縣令委本道觀察使速具條疏聞奏當有處分又詔曰政在養人實為邦本朕庶存節用以拯凋殘咨爾長吏宜加安撫申明曉示令悉朕懷

十九年七月以關輔饑罷今歲吏部選集

德宗元和二年八月以沒蕃人僧良闡等四百五

人自吐蕃復還中國命京兆府勸責先身亡及送在神策軍餘三百九十人詔良闡等頃因淪陷久在殊方或有平日遣人或是衣冠舊族萬里歸國尤所哀矜應歸及分配并侍親等人委所在特加優恤四年九月普寧公主奏出城行田帝令中使彭希昭宣以禾稼初登或慮蹂踐且歸第以俟來月七年十月制册皇太子其天下高年廢疾者委所管州縣各加存恤

十年二月以開州司馬劉禹錫為播州刺史中丞裴度奏禹錫母年八十今播州乃猿狖所居人跡罕至

禹錫誠合得罪然其老母必去不得則須與子爲死別傷陛下孝理之風伏請屈制稍移近處使得終養帝曰夫爲人子者每事尤須脩謹嘗恐貽親之憂今禹錫所坐更合重於他人豈可以此論救度不能對帝乃曰我所言是責人子之事然終不能傷其所親之心明日改授禹錫連州刺史

十二年二月撰貞元集要廣利方憲宗親爲之制序散題於天下通衢其方摠六千三種五百八十六首九月詔諸道遭水州府其人戶中有漂溺致死者委所在收瘞其屋宇摧倒亦委長史量事勸課脩葺使得安存

穆宗長慶元年七月大赦制天下百姓年九十以上委所在長史量加存問

文宗太和元年十一月詔應配流靈夏等州及天德軍人等自今後宜許將家口赴流所除本身外亦據口數給熟食遞送

六年正月詔京城內有鰥寡孤獨不能自濟瘠聾跛躄窮無告者委京兆尹量事賑恤其所破數聞奏五月庚申詔諸道應災荒處疾疫之家有一門盡歿者官給凶具隨事瘞藏一家如有口累疫死一半者

量事與本戶稅錢三分中減一分死一半已上者與減一分本戶稅其疫未定處並委長吏差官巡撫量給醫藥詢問救療之術各加拯濟事畢條疏奏聞天下有家長大者皆死所餘孩稚十二至襁褓者不能自活必致夭傷長吏勒其近親收養仍官中給兩月糧亦具都數聞奏江南諸道既有凶荒賦入上供悉多蠲減國用嘗限或慮不充宗廟切急所須外有舊例市買貯備雜物一事已上並仰權停待歲熟時和例舉處分

七年八月詔百姓困窮弊繇姦吏政苟不擾人皆自安其司農寺供宮內及諸厨冬藏菜並委本寺自供其菜價仍委京兆尹約每年時價支付更不得配京兆府和市其諸陵守當夫宜委京兆府以價直送陵司令自雇召並不得差配百姓應寒食雞差配及樹栽脩橋柴木選場棘等便於戶稅錢內尅折不得更令和市天下諸州府應納義倉及諸色斛斗二合耗外切宜禁斷仍委度支鹽鐵分巡院及出使郎官切加訪察

九年八月以責授閩州刺史權處爲鄭州刺史璉宰相文公德興之子少儻名譽籍甚於士大夫間會德

輿門生李宗閔爲相璩爲中書舍人宗閔敗璩不自
安頻密上章自雪黨比遂改授閩州及是帝知璩所
生母抱病因有是命

開成元年正月己巳東都留守司徒兼中書令裴度
上言前懷州武德縣令王賞以失縣庫子賞乃盡償
所欠緡錢庫子莫可得獄固難竟河陽節度使溫造
嚴刻禁賞三年母老不得侍疾母亡不得服喪大理
寺執文斷疏疑似之間寬滯深久帝方留情刑獄聞
之卽時詔釋賞

宣宗大中四年正月詔有水旱處宜令州縣長吏多

方便恤務使安存如有甚不支濟仰具事繇聞奏別
議處分

懿宗咸通四年七月朔制曰安南寇陷之初流人多
寄溪洞其安南將吏官健走至海門者人數不少宜
令宋戎李良瑛察訪人數量事救卹

哀帝天祐二年四月詔鰥寡孤獨不濟者長吏量加
賑卹

後唐莊宗天祐二年四月卽位制曰應諸道管內有
高年踰百歲者便與給復永俾除名自八十至九十
者與免一子色役州縣不得差徭

同光元年十月詔應鰥寡孀獨無所告仰者所在各議拯救或有年過八十者免一子從征

十一月勅左降官均州司馬劉岳有母年踰八十近聞身故既鮮兄弟別無骨肉孤魂旅寄誰為蓋棺准本朝故事許歸終三年喪服闋如未量移即赴貶所明宗天成三年十一月己丑出潜龍宅粟以賑白官長興二年十二月丁丑帝謂三司使曰先是兩川隔道兵士所有家屬常加贍給勿令失所非孟知祥初有全蜀之地三年七月丙戌詔賜諸軍救接有差

四年九月丁丑范延光奏隔在兩川兵士家口自來

支給衣糧今緣國計不充欲權停支給帝曰彼非願留因事睽阻父子化離非人情也不可頓絕支給其間願歸鄉貫者從之如有子弟許繼其父兄本軍名糧如無鄉里可歸無子弟承繼且量支一年以是曉諭其家

漢高祖即位太原至東京謂左右曰過陳橋見百姓桑棗空有餘折其廬室悉墻垣耳因荒邪因兵邪左右對曰此契丹犯闕時杜重威宿漢軍之所也上惻然嗟嘆曰重威破國殘物一至於此此而不討是朕養惡蓄姦何以為蒼生父母副海內俟望之心也左

右皆稱萬歲

周太祖廣順元年八月契丹瀛莫幽州界大水饑饉
流散襁負而歸者不可勝計比界州縣亦不禁止太
祖愍之詔沿邊州郡安郵流民仍口給斗粟前後繼
至數十萬口

三年正月庚午萊州刺史葉仁魯犯賊法等斷處死
賜自盡將死太祖遣中使賜酒食宣曰汝自抵刑憲
國法如此爾有老母當遣存恤耳仁魯感恩泣下尋
死之

顯德元年正月赦天下年高殘疾鰥寡孤獨所屬官

更務行存恤

